

皇清文穎續編

皇清文頴續編卷首二十三

高宗純皇帝聖製詩

七言古詩

神木謠

都城東有巨木焉其長六十餘尺卧於地騎者
隔木立弗相見也相傳前明時所置以應甲乙
生氣云作神木謠

天三巽一含精腴深山大澤連林扶壽突靈椿忘榮

枯所樂不存屣棄渠遠辭南海來燕都甲乙青氣鎮
權輿是稱神木衆木殊春明舊蹟久聞予便中一覽
城東隅長六丈餘卧通衢圍乃不可規矩模巋然騎
者能蔽諸四百春秋一瞬夫雨淋日炙風吹敷枝幹
剝落摧皮膚隙孔瞋菌鬱繆紆爲想懷材昔與區凌
雲概日垂扶疎翩集不脛曰人乎天也將以爲貞符
試看虛中巨查如堯年貫月厯刼餘生育盛德釐皇

圖

闕虎騮歎

我之十駿皆權奇其元敝惟一已老老者其名闕虎
騮十裏巨擘匹者少齒長休養又多年碩果不食猶
英矯每來南苑必牽視顧我長鳴意如惱承平致力
無過獵何由却出古北道馬乎馬乎尙若斯固宜人
中有結草

佶閑騮歌

驥不稱力稱其德佶閑騮者德力全萬吉騮帷裏闕

虎驕

老繼其後者惟斯焉去秋大蒐木蘭鹿箭不虛

發倒應弦今春小試南海子驚麋蹙斃無勞鞭馭玉
逐星乃餘事馴良若此誰比肩儲英惠駿備天御吾
更因之厯育賢

望石經山

三車妙諦佛口宣滿字萬劫留人間是誰局鏑彼蒼
巒云待滄桑以後傳只今可望弗可攀後之來者想
亦然又誰得視梵帙全我聞了義不涉詮詎繫糟粕

尋窮筌更思此或佛說禪用示卽言卽非言

孔雀開屏

西域職貢昭咸賓

哈密以爲歲貢自康熙年間率如是

畜籠常見非奇

珍珠毛翠角固可愛孚卵成雛曾罕聞數歲前乃育

兩鷄雞伏翼之領哺喝淋滲弱質隨雌雞老雀籠中

情反邈三年小尾五年大花下開屏金翠簸綵羽映

日煥輝輝圓眼凌風張箇箇低飛嫩篠高屋檐繡翼

雙窺玳瑁簾招之卽來拍之舞那慮翻翽葱嶺尖於

禽亦識土產好菁莪
樸風人藻盈廷濟濟固未能
離文揭覽慚懷抱

托和鼐行

我師攻圍賊庫車臨衝第第四面羅舊降伯克

回部中宰

桑謂之伯克

爲我用其名鄂對顯秩加

授職散秩大臣

備知彼中

之形勢悉告將臣防周遮托和鼐

地名

通塞里木

地名賊

來援者所必過爰遣達克他那

藍翎侍衛名

瞭遂見蹤跡

詳寡多以計誘賊賊遂至請爲前導勦賊窠發師順

德納

副都統領
隊大臣

率往堂堂之陣誰逆賊賊不自量犯

兩翼兩翼飛馳張鵠鵠長箭大礮如雨下狂狁奔亂
氣消磨填溝受殺敢迴顧血流漂杵時無何剿賊二
千四百餘傷我十數忠堪嘉是爲狂狁第一戰遂叨
天佑威荒遐軍書日馳六百里奏函夜至披衣視賜
官錫祿酬庸勲克城更待頒恩旨討逆伐罪非得已
鯨鯢京觀豈所喜

和落霍漸行

今春我師勦逆夷首戰實和落霍漸斬將搃旗早報
捷酬勞頒賚已有差卽今生解俘囚至曰渥赭特宰
桑伊散秩大臣曾授職乃敢倡亂如鴟鴞面詢彼所
致敗故咋舌惟歎天奪其彼衆猶有千餘騎覘知我
寡設計奇輜重遠行誘我逐層層伏賊據險巖官軍
四百始馳至少騎示弱山之陲我進彼乃遙涌集銃
礮如雨循環施我軍曾無一傷者百靈擁護信有之
衝鋒突入矢齊發賊乃喪膽紛離披鹿埕隴種各逃

命大鞬大膊張軍威殲彼屍僵近四百負傷遁者數
無訾是誠

天助額手慶奮勇要亦資人爲問率軍者其人誰超

勇親王家聲貽

將軍策布登扎布爲超勇親王額駙策楞之子其兄成衮扎布襲封親王

策布登扎布以奮勇著績爵封郡王亦賜號超勇

猗猗行

小和卓木

其號

霍集占

其名

領兵來援圍城嚴先是其兵

來赴救托和龍

地名

已二千殲逃生回者匍匐告昧死

尙敢潛窺覘城中知有賊接應借一出突施戈鏃緣
旗圍城腹背敵屹立不動戰方酣是時實賴愛隆阿
副都統領
率千騎至皆奇男橫衝截入亂狽陣斬將
隊大臣

獲醜如囊探狽難當復大敗東籠案角相藉擡毆
至鄂根河之側溺水斃者如眠蠶賊約五千三千死
千餘戰士威風添霍集占乃抱頭竄塞其大纛銅旗
尖咳首五色書旗幅不解其義言訖訖驛致旣喜復
致惜設執逆首除凶愾徂惟求定靖遐壤止戈和衆

吾方忼

駐行營

今年獵場向迤東崖口外卽行營駐曉涼羣已換旃
冠背指離宮猶驛路輕驄得得進圍界漸遠村莊多
野趣四十八家率獵騎橐韃供役咸來赴牛牢馳圍
滿谷中乳餅馬潼隨意酤厄魯驚歎有如是伊犁較
此難言富山莊幾日陪宴賞宮室衣冠非所諭古來
北部輕南朝今日歸新原勝故我聞此語心爲怡延

美孰非

祖烈貽共搢紳士議兵革與介冑士談書詩以水投
石昔所譬杓鑿弗入其奚疑習勞繩

武益懃懃一家中外綿丕基

俊鶻驄歌

烏良海獻胡青驄天閑牧養經再冬本是俊骨易調
習今來備駕秋圍中左旋右抽盡如意發小殪大皆
從容一馳疊獲鹿日兩再馳更斃狐之封千二百騎

所共觀無此此輩惟面從致力可息佳名賜亦不啻
力德並同

叢薄行

叢薄之中聞有虎三子逐逐隨其母鎗斃於菟及一
子其二曳尾藏深莽惡獸應弗留餘孽是非所云不
探卵^叶因命生擒觀壯材羽林微釃皆暴怒兩人搏
一何足云一人獨攫誠堪詡其名乃曰貝多爾索倫
侍衛中英楚手尾挈領安且詳須臾虎兒入柙攜被

斑綳白涉鋪張豈似今朝萬目觀喜亦詎爲萬目觀
適有新歸化布魯

大宛馬歌

今之哈薩昔大宛

哈薩克雖三字急呼薩克則爲一音蓋本兩字漢字析而爲三

山神種古所傳烏孫中閼阻聲教攘爲已有曾貢閑

不仁之守再世斬伊犁萬里拓幅員哈薩布魯

布魯特字

從上亦急呼成二字

胥向化無他爲費致敬虔騷襲汗血寶方

物左右部長及可汗遣其首領遠來獻却之失望厚

賚還駘馱駟騶類實駉匍匐牽跪陳墀前爲龍爲駉
各天矯雄姿逸態英且閒流珠歆玉誰則見奔霄追
電有必然往者貳師求善種徒勞數萬惡少年致一
二耳猶艷詡奚稱歸德開遠門闢疆勤遠非本意人
歸天與寧可捐人歸天與寧可捐作歌自警示後昆

黑水行

喀喇烏蘇者唐言黑水同去年我軍薄狃穴强弩之
末難稱雄築壘黑水待圍解詎人力也

天幘幪明瑞馳驛踰月到面詢其故悚予衷蜂蟻張
甄數無萬三千餘人守從容窖米濟軍軍氣壯奚肯
麥麴山鞠窮引水灌我我豫備反資衆飲用益豐銃
不中去聲人中營樹何至析骸薪材充著木銃鐵獲萬
億翻以擊賊賊計窮先是營內所穿井圍將解乃胥
其中聞言爲之悵諸臣實鞠躬旣復爲之感

天眷信深崇敬讀

皇祖寶錄語所載曾聞我

太宗時明四 兵來戰正值大霧彌霧敵施火礮
樹皆燬都統艾塔往視攻回

奏敵礮止傷樹我兵曾無傷矢弓匪今伊

昔蒙

帝佑覲揚

前烈勵予冲詎人力也

天帡幪大清寰海欽皇風

江天風雨歌題宋宣和畫

江天低黯雲脚垂雨意欲慳風殿之霧霏銀竹忽立
雲溟濛那辨天之涯溪頭舟子招不得驢背破繖安
能支客不怨雨怨風虐迫來淫潦夫何爲北方三四
月例旱微雲總被風吹散南吹雨來人不欣北吹雨
去人增慙風乎雨乎爾豈不徒勞何不分江國之殢
雲爲北地之甘膏將一舉而兩得稱巽二之功高道
君此圖意何託徒觀濕潤彌空濶九成誇奪造化功

卷後有宋臣
張九成跋語

大餅漫從廟市獲

見卷後張
照記語

幻榮辱亦

幻風雲達觀真不值一噓

博羅齊行

博羅齊者鄰和闖賊猖據險偵我軍先是圍解黑水
困元戎遣救掄二臣一爲瑚爾起吉林舊族世受恩
一巴圖濟爾哈爾乃厄魯特宰桑其勇誠超羣同心
協力速赴援率軍數不能盈千途歷戈壁不毛之地
負甲步進無俄延哈拉哈什已垂陷齊凌札布馳來
言夜急行至伊立齊時賊望風先逃奔集兵拯哈拉

卷之三
三
哈什賴

天大霧彌漫漫乘霧直搗賊營後伺怠奮勇攻中堅
斬將舉旗獲輜重孤城恢復餘俱安昔薛延陀禱神
能致雪冀因李勣終乃自敝焉此霧或亦敵鮮答西域
習咒術者能禁制作使風雲雨雪霜霧名爲鮮答翻爲我用成功全易云
天所助者順向猶未信今信然持盈知足感

帝佑敢肆志詡能開邊

鳩鵲

鵠鷗鷺皆水禽得魚則飽失魚餒水深魚潛不易

致葦叢逐逐空伺怠

解一

大旱陂池涸其淵吁嗟鱗族

見在田大鱗強項立待斃小鱗枯與焦泥連

解二癡龍

抱珠眠未醒興雲作雨如弗省剝床以膚切近災白

戕爾類詎甘肯

解三

鵠鷗鷺意乃欣舒頸擗翼呼其

羣夥聚沮洳任所取擇肥啗大無逃鱗

解四

乘他之危

幸他急不援手救又下石仁者弗爲義者怒誰能徒

作狎鷗客

解五

技哉羽林射生手銃叉矰繳無不有螳

螭捕蟬古所云惡鳥何妨任亟取

六解

鳥驚人去翔天

未魚守微波煦沫活毆強救弱小差排終賴甘霖蘇

萬物

七解

於鳥行義於魚仁實鮮所傷多所存竭澤亦

豈龍所願吾之罪耳空絮言

八解

墨爾根巴圖魯瑪瑞斫陣歌

乙亥以來有事戎賴我衆力成膚功重賞之下多勇

士捨身圖報羣輸忠舒布圖鎧實巨擘三巴圖魯繼

厥蹤

見丙子集中

後乃不可屈指數就中瑪瑞尤稱雄經

卅餘戰皆首出塞旗斬將誰爭鋒鐵騎憑陵諸鄂拓

準夷部

肅清伊犁揚英風今春我軍急進援富德率

落名

軍如黑熊瑪琿命領塗路首

蒙古語先鋒探信者

呼爾璦處賊

迎攻堂堂之陣賊辟易琿乃獨進躡寇窮金鞭連策

大宛馬繡螫不用用雕弓一箭正中賊要害再箭倉

卒乃落空三箭終殪賊墮馬忽忘深入賊隊中蜂屯

蟻雜齊擁簇琿之馬斃倒沙蓬捨馬步戰短兵接叱

咤凌厲氣如虹我軍隨進琿乃出檢傷十處中

去其聲

躬以帛裹傷明復戰義膽自有神
旂幟花門降胡昨
舌歎如此超勇聞何從將軍一一據實奏不奇其勇
憐其衷設非立志忠且壯安能効命功名崇馳驛令
歸不可再嫖姚賜第今堪同席前備陳隕涕聽厚賚
覺未酬勲庸仍歸禁旅領宿衛若無曩勩焉謙沖古
來歸奏未央殿却聞天子不召見

海嶽開襟歌

樓名上有扁曰乘六龍

滄池漾漾蛟龍窟中聳玉臺規寶月祖洲之草琪樹
枝襲芳籠影水精闕周禪瀛海誠曠哉崑嶠方壺縮
地來八琅雲璈底須奏松風揭聽塵襟開芥舟祇需
均堂水溟渤何勞千萬里得其環中遊物外棗葉須
彌皆一理我之所戒在求仙海嶽寄興屬偶然保合
太和勵體乾時乘六龍以御天

陶尊

有虞合土貴質淳冬官埏埴司陶人不鬲不甌見此

尊入土出土幾千春爛斑青綠周身皴光匪外發內
蘊真乍視夏鼎商彝存撫之體輕堅逾珉其響清越
如泗濱乃悟陶器成神甄苦窳髻墜非所論燥濕弗
受剝弗損叶使我慕古輕華珍穆然若見封垂倫允
宜衢設惠萬民

密雲行

京北重鎮稱密雲巖城墀堦新舊鄰控制三邊列棨
戟勝國會此屯萬軍兩山寺塔節端建南者已頽北

猶存靡餉士不得實用剝民奉已祈佛恩爾輩富貴
亦何在空令過客興慨論白河流西潮河左徒觀形
勝誠復可由來在德語不刊詎誇扼險牢關鎖卽今
大宛爲荒服木蘭近園來往熟築隄障水惟利民
熙康
年間
事 我每經行緬
聖躅得勢不事守有餘失勢竭力守不足勢匪地利
實人和敬已勤民籲

天福

哈什哈爾回衆投誠詩以紀事

今春圍解黑水營全師迴阿克蘇城賊不敢遮亦不
綴彼力創竭足堪徵北塞調馬往二萬益以索倫之
勁兵以布易回粟供餉數月休息胥飽騰整師兩路
一時進殲渠務使回衆寧屈指此際壓賊境又盼佳
信夙夜縈朝來驛致將軍奏兆惠報回衆投誠拆封
披摺一詳覽歷歷都悉軍前情進至伊克斯哈拉地名
前隊中夜聞人行奮勇圍捉喊勿殺是投誠者來相

迎久慕歸順大皇帝奈脅霍集占弟兄大和卓木今
肆掠想同伊弟潛逃生舊伯克等差我輩願師速往
揚威聲馬驢牛羊被擄去欲追擒彼嗟無能懇籲將
軍早赴援庶和卓木未遠征兆惠悉此率兵進通信
富德同謀乘相機持重慮賊詐更慰萬里繫念忤四
大回城三已得遊魂釜底焉支撐斷其左臂固美事
不無少恨煩懷仍使波羅泥都大和卓木名也就獲以之餌
彼弟或聽乃先兵至早跳去復需時日勞軍偵二魁

俘虜靖遐壤靜俟

天佑歌武成

副將軍富德等追及兩和卓木大勝回軍捷音

至作歌紀事

慶霄對月方開筵將軍捷報驛騎傳
擘囊展書歷歷閱額手慶慰衷心憐憐者我衆
實奮力慰者呵護惟賴

天萬有餘里所致馬又踰戈壁無水泉
裹糧追賊幸

尾及彼逃乃在廿日前明瑞先已折其角未經大創
猶抗顏阿爾楚爾列賊衆避其輜重伏據山輕舉墮
術在所戒集思持重勝算先偏伍彌縫密佈置發縱
指使皆英賢諸大臣均予心膂巴圖魯侍衛比肩夙
所教養共休戚敵愾兼逮與僥焉同心戮力功克就
二豎鼠竄圖苟延戰罷檢閱傷一卒殲彼計級乃盈
千師難到葉爾奇木况過數千里行遄以少勝衆翦
賊黨國威赫濯揚天邊優敘未足酬勞績桂觴欲泛

還罷旃百年養士今獲效

祖宗福蔭貽萬年佇待俘虜到露布西師之役方稱
全西師之役方稱全行張凱宴勞凱旋

雪獵

搏桑日出鹿罷鳴興安放圍趁曉晴須臾山頂塞雲
興霏霏霧霧空谷橫配藜浩唐霽冥冥鏤冰翦水霏
祥雲側峯橫嶺忽瑤京丹楓翠柏胥著英剏景宜視
復宜聽怒號萬竅不一聲砰磅汨瀾駕廣陵鏐鏐錚

銷兵馬行又如張樂於洞庭八音繁會歸和平是謂
山靈示厥靈鴻網獵騎風慣經淫淫裔裔緣峻嶒迷
津失歧又豈曾圍合廣甸無逸麋毳服蒙茸凌寒輕
瓦衣不漏漫譏評烏號夏服手中抨命處藝殪奚足
稱嘉哉札薩奉上情上下和樂延休禎亦不詡言戎
索成玉田蹕踏旋歸營和門侍立漢九卿褒衣博帶
誠儒生相如之賦爾應能

放鹿行

邇年迤西率未到今來欲一窮其奧獵所未經獸所

都湯武毆民義可曉

叶

夷阮拔鹵嗟太勤供役惟千

二百人峯巒谷阻弗遺棄雁行魚貫聯汾沅放圍隊

疎漸進密廣麋之盛過沮漆大宛青驄金僕姑或羣

或友燕悉率肩疲腕怠獲他他廣原奔迸猶餘多物

亦命也戒盡極取之無厭理則邪傳宣開圍任逸避

長林豐草悠然逝索儉笑我煦嫗仁摺紳詡我祝網

義詡我笑我兩弗居蓄養外圖斯深意

天半舫放歌

人之好奇有同然顛倒名象圖新鮮於船號廬斯廬
耳於室稱舫又舫焉其實室廬與船舫求真不得均
幻傳山館有樓天半懸因之曰舫較舫安出沒濤山
有靜趣泛濫雲海無驚瀾呼吸顚氣遊以天何須駕
之東瀛渤遠涉蓬萊方丈求神仙

後狷齋行疊前作韻

樹丸火米符祥占

喀喇烏蘇之役將土方堅壁趣援
時於固守處得窖米贍軍樹上檢

鉛丸濟用並

獲神助

孤軍接應遂解嚴整師救和闐玉隴帕

首蟻雜胥劉殲將以三路進掃穴僑如叔仲先潛覘
狼狽挈孥豫遁去二城降不勞矛鏃競作鐃吹迂主
帥從今食飽眠亦酣選卒前遮復後襲義無返顧均
雄男線天磧地罟入阻欲得虎子虎穴探明瑞邀之
庫魯克以少勝衆折祆機富德追及伊西洱用強驅
弱如掃蠶鹿埵流湯賊屢敗獲銃舉纛軍威添遁入
異域卒獻馘飛來報捷紅旗尖凱旋攜以貢武庫阿

渾譯出其文詁

肅上旁行書命以托特字譯之
回中稱通曉經典者曰阿渾

亦知

福善禍淫道胡乃俏德興狂憮敵愾致力衆惟惜事
成志遂吾敢快

狷劔行

逆酋小和卓木霍集占所佩副將軍富德大勝
之於伊西洱所獲也凱旋奏進詩以識之

袂撓展室青萍寒一條秋漢溢波瀾蛟龍水斷犀陸
剗吳鉤薛燭古所傳秦階九寓胥晏安歐冶之法誰

則閑絕域尚武求精堅銛鋒三尺不可刳弱肉強食
必佩旃況彼窮奇肯離焉伊西大勝狃燾舉二酋倉
皇駭走前獲茲銳器羣訝觀訊醜踉蹌具致言劒藏
霍集占身邊惟命是顧乃忍捐異封獻馘師凱旋彤
庭奏進出匣看光芒誠覺星辰連發弄武庫識歲年
保定諸部籌久全

題金廷標畫

一川流水兩江村問村何名朱與陳紅船鼓吹方迎

婿醉儻側弁無禮文太古猶見民風淳橫溪小舫俯
碧淪左圖右史伴閒身疑是煙波釣叟倫近橋且艤
水之濱有客牽驢過橋垠驢怯不度駐足蹲後毆前
挽情入真此岸綠樹葢四鄰老幼男婦都欣欣擔籃
而至市蟹民作惡遇是駉孩羣放籃走迸蟹紛紛旁
行郭索如逃軍衆童爭攪跋跣奔獲者喜走失者窘
叶螯傷足者呱涕痕蟹翁瞪目徒怒嗔七情畢寫皆
得神顧陸以後今幾人

拔達山八駿馬歌

大宛駿馬斯已奇拔達山駿奇倍之方隅貴山南以

西獻馘稱臣誠識時良驥服阜納賁隨青驄送喜領

羣蹄捷音早共紅旗馳

右送喜驄

堅昆底定我馬歸鶻其

英鷲色其騏

右堅昆鶻

洱海

即伊西洱淖爾

一戰塞厥旗獲良翻

以徠白義

右洱海驄

有騾紫雷名雅宜掃塵滅迹追無遺

右紫電騾

服遠在德不在威闕虎

舊上方十駿之一

已老茲其苑

右服遠驄

蝦蟆一跳丈六齊掉尾肅肅白玉題

右玉題駿

呈覽

按隊過河池祥霞輝英光配藜

右祥霞驥

逸足未騁望可

知箭雲底藉鞭箠施

右箭雲驥

徒觀骨格皆英姿揣稱且

命儒臣爲天閑調習付有司待子秋獮徐試騎譬霍

集斯居京師富貴之更教禮儀遊閭闔今觀玉臺

叶

初非求馬興戎麾銷兵從此含生熙

漢玉璧

入土出土各萬年壽過赫胥及驪連謂之曰漢頓置

焉誰謂洪荒無玉人

叶

否則琢磨由真仙若無若有

龍鳳卷金堂十二相周旋以古自澤以質全奚爲海
水奚桑田秦爭趙奪誇智權如蒼蠅聲翫翫然

登望蟾閣極頂放歌

高閣臨湖迴且虛玲瓏石洞負階除丹梯先陟百十
級厯厯白玉欄杆扶升堂香展畧憩息其上更有三
層廬却笑九年三到吾三層躋乃一次無似此構築
緣底事自問不解況人乎今朝佳景可再孤索須極
頂登臨諸造半已覺豁眼界上方實令心神舒暢春

東望神仙區西山真是西竺如北屏萬壽南明湖就
中最勝耕織圖黍高稻下總沃若是真喜色遑論餘
亦有曉蟾西字留三五清光得未酬咄哉吾猶失達
觀去聲此閣與月曾殊不試看鏡裏廣寒界七寶團欒
不藉修

灤陽別墅放歌

山南爲陽山北陰水南爲陰水北陽陰陽錯綜無定
位南北對峙有定方淮陰亦有韓漢陽亦有張首陽

亦有夷山陰亦有王彼皆幸生文字邦地靈人傑相
羶薌灤陽別墅開書堂此山此水豈非有自禪通循
蜚之鴻荒惜無人而過問然未失其真常是時秋風
八月含微涼寒潭潦水澄灤江扁舟徑渡少留憩庭
前松樹蟠龍蒼山自崇崇水自湯湯卽此今昔誰曰
滄桑癡哉峴山之碑令人徒笑叔子羊

雨中塞上行

夜雨連晨勢未已行旌先發難中止文侯罷獵必親

往我亦何妨一仿此白榆綠柳時逢迎快哉雨中塞
上行杜老前後則何有周王左右堪同賡製衣策馬
跋泥淖誰言秋雨弗濕帽行宮駐蹕豈不佳習勞先
去聲衆從吾好鑾儀衛率校尉隨輕輿逸坐邪肯爲內
扎薩及外厄曾囊韃扈從瞻威儀巒姿林態渾難狀
配藜旁魄復滌盪萬馬奔騰如萬舟雪浪銀山陵潏
沆北人使馬南人船一合相真成大觀山村老農笠
底笑明春種早不待言

塞宴四事

詐馬

詐馬爲蒙古舊俗今漢語俗所謂跑等者也然
元人所云詐馬實咱馬之誤蒙古語謂掌食之
人爲咱馬蓋呈馬戲之後則治筵以賜食耳所
云只孫乃馬之毛色卽今蒙古語所謂積蘇者
是亦屬魚魯茲扎薩克於進宴時擇名馬數百
列二十里外結束鬚尾去羈羈馳用幼童皆取

其輕捷致遠以鎗聲爲節遞施傳響則衆騎齊
騁羈馱山谷騰躍爭先不踰晷刻而達掄其先
至者三十六騎優賚有差所以柔遠人講武事
也

名王詐馬存遺風獻筵備陳表敬恭廿里以外列駿
驄置郵傳命聽發蹤宣教施銃星火紅連聲遞令頃
刻通砰磕萬雷忽落空翩若驚鴻逸若龍雲屯颺歛
倒呂洪旁唐閃霍復春容振林駭谷躡鼻巖平沙草

軟淨塼塼駛駛束尾綰其髮輕方致速騎以童捷足
獨出傑且雄選三十六惟良駮按第行賞務從豐只
孫古俗想像中和樂還因寓詰戎

什榜

什榜蒙古樂名用以侑食今俗所謂十番或因
此楊萬里詩有全番長笛橫腰鼓一曲春風出
塞聲之句蓋樂曲名番本塞外語而傳譌耳其
器則笳管箏琶絃阮火不思之類將進酒輒於

筵前鞠脰奏之鼓喉而歌儼羅赴節有太古之
遺音焉

平原擇向圓幕張酪酥乳酒湘黃羊名王捧觴起上
壽較漢公卿禮數詳渾撥四火不思曲長朔管如鞭
吹鳴羽發徵氣內運叩角動商響外披初奏君馬黃
大海之水不可量

曲首句

繼作善哉行無貳無虞式穀

友朋誰云朔漠無古樂絕勝鄭衛爲新聲我惟中外
一家用聯上下情亦不侈談有虞氏四裔之樂舞於

庭

相撲

相撲之戲蒙古所最重筵宴時必陳之國朝亦
以是練習健士謂之布庫蒙古語謂之布克脫
帽短襦兩兩相角以搏踣仆地決勝負勝者勞
以卮酒卮魯特則袒裼而撲雖蹶不釋必挫首
屈肩至地乃爲勝彼嘉其壯賜之羊羴則拱臂
探掬顧盼呿吞聲若飲歡其舊俗如此因以示

惠云

健兒揔袖短後衣席前相撲呈雄嫖捍拖拗拉矜矜
拱踉蹠踉蹠且蹠乘間伺怠出以奇恧然躡蹠力
不支勝者賜酒蹠飲之別有厄魯均新附其撲法乃
異舊部露身赤腳惟著袴撇捩蹠蹠空拳赴失計忽
仆伏地據騰跳翻作康王跨兩肩著地頭倒豎方得
謂之決勝負勝者揚揚意實歡負者反求微醜顏宣
傳典屬呼來前上方肥羊出厨盤長截碩臙如舉山

七箸不設俾恣餐誰識不足君所言快哉大嚼真壯
觀豈對屠門空望懸跪振雙臂攫且搏右哆左喙直
下咽倏似長鯨吸百川意氣自若殊昂軒均令染指
果腹便小哉食肥張齊賢是蓋衛拉舊俗傳示恩獎
勇一試旃食罷命前面詢焉弗茲食者閱十年

教駢

教駢攻駒周禮雖載然後世僅知攻駒而不能
教駢蒙古則熟習其灑謂之騎額爾敏達驪馬

三歲以上曰達驛額爾敏則未施鞍勒者也每
歲扎薩克於所部驅生馬多羣至宴所散逸原
野諸王公子弟雄傑者執長竿馳繫之加以羈
韁始則怒騁駢趨或豨突人立嘶齧雷殷馭者
騰趨而上控掣自如須臾調良率得名馬

二歲爲駒不勝鞍三歲爲駝始堪教夏官廋人早失
傳未若朔漠存古調扎薩獻宴必備觀分羣別色陳
平原壇廬賜食較撲罷按轡一覽同名藩名藩子弟

皆吉服上馬執竿好結束毆來萬錦歛披前光采陸
離紛奪目薄言駟者有驕皇驛騏駼駟駟黃繫之
維之取傑驚綫絆未及先跳梁齧草飲水本天性機
韋乍拘自覺病驚軼狂擲詎能無處之以暇堪力勝
牽來蹀躞人爭騎驀跨那待羈馵施擢足軒立忽落
地翻身騰馮捷於飛盡態極變不可狀驛突雄驅若
翻浪毛龍逸虎旋就馴人有餘閒據馬上馳驟寧供
耳目娛馭騷耳中掄諸憑閱考牧悟至理不教而

成事所無

回玉圭謠

崑崙西極玉所都穆滿靈器傳西胡楚曰琤珩魯璠

璵其偶然耳古論諸乃今通道恭嶺途歲爲恒供寧

十區是圭寶彼之寶符驛來什襲呈天衢阿渾

通回經字

者譯出其文攄駢蕃老語歌九如福祚昌熾享齡遐

叶豫順兆姓輦皇圖宜子孫佩意不殊韞櫝爰識咸

賓模保奭用訓猶忸吾

英華殿菩提樹歌

我聞法華調御丈夫成道處乃於伽耶城中菩提樹
又聞華嚴海會諸如來一佛一樹乃至恒沙數一亦
非合恒沙數非離是佛是樹皆菩提娑羅貝多闍扶
誰則見惟有菩提之樹鬱葱蔚郁常依佛日生光輝
英華之殿聳層臺勝國莫考國初曾以居

慈寧

思齋太任篤奉佛爰供法象延禧篤祐貽雲仍時來

瞻禮意肅穆裝嚴寶軸相好合梵經或云卽是北斗
之七星貝帙一一名可徵菩提七樹森列庭是誠不
可思議標祥禎枝枝葉葉數無萬如斯無萬數繩繩
繼繼永世綿

皇清

趙伯駒六馬圖歌

平川苜蓿豐且滋清泉映帶沙岡披戎人習馬知馬
性此處調馬實所宜牽者檝者二皆駢白駒黑鬣縹

柳枝昂藏翹足驪其色一戎跨背鞍不施紫駟回首
嘶厥匹有駉齧草意自怡驥不稱力稱其德況復一
一皆英奇作者寓意應有在夏官遺法誰深知卽今
大宛致汗血骨格皆合圖中姿亦不渥洼詔作瑞亦
不交河資與師迴立閭闔詆蕩蕩欲起王孫走筆爲

偶讀

偶讀蒙莊第二篇知通適得固精義其不達者勞神
明因取狙公以爲譬此語其然豈其然吾謂漆園未

深思格物可以驗諸人固有同歸而一致常平粃之
耿壽昌出陳易新永不匱秋借春償卽朝三春借秋
償卽朝四衆狙喜怒謂爲愚何不人情一揣試

拔達山汗素爾坦沙貢刀歌

獻馘早已嘉攄誠薄來厚往遣使行感恩致貢器用
呈佩刀一握偃月形兩馬先之白與青邊臣代進達
帝京出鞘麗水躍如星昆吾割玉古所稱銛鋒鑄出
浪人精寶鈿金錯太麗生皮室革帶堅且輕無所用

也方銷兵付弄武庫徵來庭

過廬溝橋

今年凌汎無積冰潛融默化渾流平司事額手慶佳
瑞斯偶然也何足稱橋上無修防亦不見遷徙橋下
慎修防自茲多事矣卅年下口已四更無已救弊疏
其尾云斯可以延卅年三十年後將誰諉嗚呼神禹
已去幾千載補苴罅漏而已耳

正定隆興寺禮大佛疊舊作韻

無量壽如是我聞壽超一切兩足尊觀音是佛觀察
智是寺大佛實觀世音菩薩像也大士願力稱普門日一卽二墮聖
見不如泯念禮法雲

慈寧今歲開七袞延

釐虔奉大安輪五臺謁曼殊室利如山如阜齊高旻
寶螺梵鼓已朗朗嵩呼華祝猶紘紘歲事和鈴指鉅
鹿晉山燕水行行分郡城至止駐翠輦分野昂畢月
建辰離宮瀟灑鹿苑側松窗綈几堪怡神處分幾務

有餘暇問安

萱卬康强身扶持瞻禮愜

懿願云同不可況異云箕子九疇猶有數數無量逾
恒沙塵以此介

壽合天下寧辭遠勞扈衛軍徘徊散步閱古蹟隋唐
碑碣前墀存却笑吾仍執名象幾曾佛法窺其真長
歌一再疊賡韻嘒嘒詎非逞辯論信宿明當返京國
卽今轉瞬還成陳勝地少延固亦可恐妨耕稼時當

春

昆明湖泛舟示尹繼善

泛舟昆明攜近臣繼善南來亦同舸忽然博古謂盛
世襲彼漢名似弗可笑而謂之意固佳黑土原非沿
刼火未聞神池自堯乎

皆見三輔黃圖

詎始茂陵劉郎邪道

古且置言今時卽云襲漢我不辭闢疆二萬里以外
用兵纔閱五載遲西海一帶皆吾屬歲歲入貢朝丹
墀伊犁耕牧日孳息烽火不作寧邊陲一狼千羊非

所喻試問元封能爾爲

河南巡撫常鈞奏報開封水消及河奪溜楊橋

諸情形詩以誌事

方伯飛章速置郵開緘一慰一以愁慰因開封漲水
退愁在河奪楊橋流下趨賈魯雖古道不經久豈隄
防修川不能容必奔放豫齊處處將貽憂已聞南河
訛奇事河水反落淫霖秋實因散漫殃迤上正流弱
乃淤泥留一患浸淫生百患南望愁若子飢調急則

治標事遮障俾歸故道遑他謀重臣一再遣往勘督
策兼命視賑賙宣房後已失長策補偏實更無良猷
平成乏術方抱愧救民慢惜司農籌

永安泮園場殪虎

白沙翠柏山四圍國語永安名久垂

國語永安泮者漢語沙地也

林天石海滂泮披北人使馬如舟師陸離淫裔張魚

麗藏幽伏莽毋或遺獵虞報有虎負嵎

叶

遂往殪之

率伙飛要遮前後緣坂熾威不可當曳尾馳失險遽

卧淺草陂隔谷下馬相高舉虎神鎗一發斃之厄魯
回部胥扈隨咋舌脫帽欽服其此亦偶然何足奇先
是射鹿命炙炊藉草爲席樹爲帷割嘗徧賜染指誰
君臣和樂逮海涯靈器世守

皇祖貽兌戈和弓竹矢倭同珍其誰曰不宜

白鷹歌

霍罕額爾德尼伯克所進歌以紀事

受將軍檄遮賊魁設罟未入慚雉媒捧首以降心無

乖方物屢獻表賓徠每教厚往而薄來九經正義誠
昭哉白鷹今復致鷲材雪毛金脚刷羽皚下韝目不
留狼豺鵠師赤養皆旗回回人養鷹鵠者謂之鵠
師赤居之京師隸八旗蒲
萄餵肉那可儕開門揖盜謀非佳博觀今古益凜懷
作歌匪詡遐荒開

布魯特額木爾貝所獻七首歌

回部大定興農耕分駐宣撫留朝卿其中喀什噶爾
城近外部落嚴候偵有布魯特馳使伴厥長額木爾

貝名獻玉七首來輸誠佐盧回書仍左行譯出一一

申葵傾向因路阻兇醜兵戡逆靖亂今太平地爲王

土人王氓貢物表敬慙菲輕驛致金闕由海明

時侍郎海

明駐喀什噶爾

開匣尺八居然呈龍鱗其室櫛以頰玉柄金

鏤象鼻形抽看光如波溢青月芽直芒披電星封還

銷鑄胥矯情咸賓用識王道貞

皇清文穎續編卷首二十四

高宗純皇帝聖製詩

七言古詩

平原行

平原高樓臨廣津平原樓上多美人槃散行汲河之
濱美人一笑蹙者嗔竟往索頭君未許歲餘賓客稍
引去叶怪而問知賤士由乃斬笑蹙美人頭造門謝
蹙客始留卒得毛遂縱約收穎脫而出固亦奇三寸

舌強百萬師此事半信還半疑美人之頭僞乎真璧
未謀面奚區分來去亦何與去聲衆賓大都龍門務辭
工傳竒乃致失平公戰國機械以爲功邈矣吐哺握
髮風同時更有狗盜雄

清口

去年河決楊橋驛清口清流始暢適開封迤下方免
災不幸幸難料以逆賈魯奪溜仍歸淮日久慮致開
門揖劬劬督策策宣房發帑屬薪所弗惜未三月乃

大工成事在人爲語不易淮仍讓淮誠甚佳河終歸
海路艱得卽今河復並淮行刷黃至竟資清力清口
東西壩對峙付量節宣慎寸尺補苴罅漏賴斯存蒿
日何年當底績

試中泠泉

一江之水冷分三古來志乘爲斯談伯芻劉氏中泠稱

第一又新張氏第一又屬南水與人乃漠然者猶各阿

好甘其甘究之平流詎有異南北中豈殊同潭頭陀

近試偶因便德裕遠取還嫌貪松枝煮茗月初上翻
聽謾籟鳴方酣

遊金山寺三疊蘇軾韻

趙宋詩人許坡翁雄才磅礴富似海椒爲險韻再三
疊妙理無在無不在偶然遊戲叅伽陀橫江那畏排
山波中江長老一握手故鄉情誼何其多伏牛山下
重艤楫風景撩人如昔日舊編翻讀和蘇章欲效其
爲面先赤強顏倚檻安吟魄甲乙寧須較白黑花紅

柳綠春正明人所習見誰言驚子瞻磊落頗卓識飛
燄江心見何物英雄欺人力拔山設奇蓋欲曉彼頑
歸歟何事不得已底藉定盟有如水

自金山放舟至焦山三疊蘇軾韻

清流疊疊元蔭耽山以包屋稱江南竹徑禪林胥熟
路到此屈指今凡三玉局僕作重快讀秘思愛彼抽
春蠶中流豪歌復酣嘯老僧笑晤心何慚觀民休助
我正務暇亦延賞窮巖潭金山佳矣鮮隙地已嫌樓

閣羅峯酣翦江言造幽絕處勝以弗飾方可談乃復
稍稍事莊校貝多羅樹珊瑚龕踵事增華俗猶厭質
諸佛想非所甘以言施者雖破恪以言居者寧非貪
髯翁有知應首肯但已成事說何堪瘞鶴真蹟惜漫
漶爲臨元本留雲菴

遊焦山作歌疊舊作韻

金山豈無山勝在包以屋焦山亦有屋勝在山之腹

髯翁爲弟長老兄

中江長老兄東坡焦山詩非印公也

至今警歎聆其

聲君子之交淡如水每到金焦輒懷彼長江風靜波
不起青雀片刻旋至止定慧寺禮金粟身左首行齋
昔無是無過小憩緣此辰樓臺位置費太勤成事不
說自排解後言寧免他紛紜梅花已開冰玉色竹枝
全寫龍鳳文梅竹之間得句返興致亦足標巖雲槎
枒萬樹青氛氲一條曲徑菁葱分造極忽豁萬里目
吳顛魏躡氣早吞百年熙和五載狩象山迎蹕笙歌
聞

觀海潮作歌

辛未觀潮潮已奇杭人猶稱其力微丁丑觀潮潮未
至作歌高樓聊紀事似神而非者曰三逮茲三度潮
真酣却非江樓觀約畧扳得乃在柴塘尖我閱柴塘
籌禦海詎圖快覽驚濤駭因緣大汛三月三洪瀾有
若將予待跋馬指東向鹽官一條銀綫天際看捲江
倒海須臾至迎來底藉江山船色猶未覩先聞聲礮
礮礮礮鞦韆徐行按轡攬其狀大哉觀矣誰與京

胥母弭節倏奔瀉並驅素車而白馬淋淋汨汨浩湯
湯踰跽配黎白鷺下一空前此初遇竒旣欣旋復生
愁思長焚厚石弗預固秋來轉瞬奚當之

題林逋蘇軾詩帖疊舊作韻

先生昔隱孤山曲結廬愛就深林綠廿年足不及城
市欬吐皆成珠與玉晦迹不欲名一時況後世乎識
超俗幸哉五首留世間片羽吉光霄漢燭東坡見詩
如見翁五字長言猶不足三百餘篇雖在世知音誰

辨絲與肉今去坡又七百載兩賢高躅誠宜錄西湖
上讀西湖詩橫琴似奏水仙曲謾說吳人不好事祠
堂有梅復有竹和詩還擬問髯仙誰競春蘭笑秋菊

觀錢鏐鐵券作歌

表忠觀永祀錢塘鐵券却在台州藏久聞其名未覩

物秋卿同族今呈將

向會問及刑部尚書銜錢陳羣云在台州今其族姪錢選自台

州攜來陳羣卽以呈覽
作歌仍還之俾爲世寶

鑄鐵如瓦勒金字乾寧歲月

猶存唐皇帝若曰咨爾鏐董昌僭僞爲昏狂披攘兇

渠定江表禮清羸泰保餘杭用錫金版永延祚克保
富貴榮寵長恕卿九死子三死承我信誓欽毋忘徒
觀剝蝕字漫漶鐵猶如此人何方龍門致誚帶礪誓
趙宋轉眼爲新王俊傑識時有弗較善存桑梓功斯
良其時鐵券固不出南遷後出方羶薌作歌裝匣付
珍弄所嘉謝表撫謙光鏐謝表有云君親屬念皆云
必恕必容臣子爲心豈敢傷
慈傷愛詞旨剴切
可謂善居功者

再遊靈巖作

昨日細雨今朝晴南國爲喜宜春耕靈巖秀色在咫尺姑舍遼待非近情出郊野町濯綠潤花柳時世裝嫌輕駢填老幼步隨馬禁躡菜麥憐農氓不三十里倏已到盤旋山路原熟程松風謾謾掃塵跡塔影矗矗標心旌調御丈夫對我笑去來現在奚稱名到此著語不可得逡巡行館憑南榮太湖眼底一勺水三萬餘頃誰量衡但覺空濶物不染無內外復無將迎我心與之然乎否風鈴落落催宜行

望玉峯塔未到

心遠閣已玉峯半塔猶峯頂欲登憚適百里者半九
十方知此語真無間一時騁目託遙思扶欄拾級何
然疑肩輿坐看揮汗者彼人子也勞奚爲

詠和闐玉鳧魚壺

和闐綠玉尺五高纏頭歲貢屬以包玉人琢磨精釐
毫漢銅鳧魚壺製標魚泳鳧翔圍腹腰不惟其肖其
神超父已商丙辰周相爲曹事不師古厥訓昭無能

擲山學神堯熱海砂磔閒棄拋來賓翦拂成珍瑤席
上之珍何獨遙

天慶宮像元劉鑾塑

南雕北塑古所傳大都神塑猶存元名手劉姓元與
鑾東嶽搏換稱元賢茲天慶像鑾坯埏棟宇剝落像
巍然呵護丁甲其敢延爲新棟宇丹雘鮮像弗增易
如故焉是日路便展禮虔高居上帝絳節翮侍臣儀
從飄乎仙曹司聾啞解事艱斯非曲欲爲其難以神

喻人至理存一絜矩乃爲心寒

題宋人撲棗圖

誰家曲院池塘清一株棗樹當閒庭秋來纍纍佳實
成羣兒玉筍皆崢嶸或是謝家諸弟兄否則童子遺
去王曾撲不藉竿手雙擎以裾撻取以盤承於得戒
聲貪都不爭善哉繪事能傳情不惟傳情童訓精

雨獵

七月廿六日

塞山清曉雲如油須臾雨霽千峯頭獵騎已放奚事

止看城早駐藍旗旂鑾韉策馬便親往衝烟冒霧尋
清遊灑空時霏時却息岩枝澗葉翻銀流千二百卒
宿精練鴻綱尚致野獸稠弓漸無礙燥手濡無礙柔
一發中其麋再發斃其麋四十八旗夙習見哈薩厄
魯心服尤中朝或有諳古者謂當罷獵學文侯旣不
受譽毀寧受詰武身先意所留一之爲甚亦弗再傳
宣明雨當停蒐

佶閑騶嘆

萬吉

騶

鬪虎

騶

歸房精繼者佶閑良且駛承平豈復

有戰爭獮狩時乘資德美馳御所向無空濶遠則木

蘭近海子抨弦蒼兔七載馱彈蹄銀獐一斃坻塞上

獲鹿難數計飛越深溝更神矣去歲圍罷留養茲今

來逾覺加長齒不任鞍勒意猶壯牽向我前熟仰視

久策爾力寧弗憐後進非無老成此細芻軟秣終厭

年重以敝帷留待爾

和闐漢玉歌

今之古玉率稱

平聲

漢和闐玉古稱

去聲

漢名爾時博望

初鑿空月氏要領得無能去百餘人二人返傳聞纔

識于寶城崑崙泐澤多玉石卽今包貢猶堪徵繩窮

匣開爛然現雞冠爲色斧爲形瓊瑤自稟天地秀汗

灑血浸皆虛評入土出土卽信有猶當勝彼埋幽垆

相如詭奪和璧返荀息假道垂棘呈抑爲得也抑爲

失於玉何有紛人情不藏不逾吾慊若用誌萬里來

寶誠

愛烏罕刀

西蒙奉表馳使伴獻名駒二抒遠誠陪臣乘傳達帝
京敬同諸部朝元正豐饗曲宴皆預令承筐幣帛厚
賜行繫密爾漢

密爾漢
陪臣名

感悅并貢刀可否諮公卿笑

而許之聯彼情長跪百鍊雙手擎彎如碧水弓在檠
雖弗適用器則精上有白氣橫庚庚不資磨瑩漫理
呈匣皮武庫誌偃兵玉關開後通崑瀛旣非招致來
亦迎殷殷予意惟持盈

安集延七首

持短入長不踰尺應速用近兩刃窄水晶爲靶月芽
直筠沖插腰豫戒迫感我厚澤貢弗惜徒觀美理霜
雪色纏綿經冗金錯飾漆龍文鞘偃蹇奕自來非擬
鄧遵得錦袂襪更檀匣襲用昭絕域兵戈釋

碧玉盤謠

碧玉之盤徑逾尺質本規圓色光澤準夷重器守世
則貯以馬湏可盈石穹廬玉醴斯陳席以招百福繁

生息仁義不施攻守易矯虔奪攘紛兵革休屠金人
且弗惜玉盤自合棄荒棘磕破邊角秦鹽隄伊犁墾
田耕者獲驛使致京飛不翼取裁改作葵花式穆然
完好綈几側湯之盤銘日新德用識顛末茗華勒

愛烏罕四駿歌

天山左右多回部聲教古艱通譯鞦分疆劃界各領
衆其名不可僂指稽愛烏罕實土著國遙在拔達山
更西遣使進表非招致淳泥蠟紙金字題先以乘馬

色不一嘉誠那責比物齊使者郵至早賜遣按程馬

到憐穿蹏曰驄超洱菊花簇度西海忽蹠金隄

右超洱驄

昂藏之驪若歆玉用昭徠遠房星低

右徠遠驪

有驪有驪

生月𩚑一形十影耳竹批

右月𩚑驪

凌崑之駿色正白不

須鞭策行追霓

右凌崑白

高逾七尺長八尺爲龍一一皆

馱馱于闐董氊四五尺伯時圖畫猶艷提別毛按品

予嘉號永誌底貢無乖睽所幸在此懼在此太保作

訓吾將俟

命金廷標撫李公麟五馬圖法畫愛烏罕四駿

因疊前韻作歌

元祐頗亦訖聲教于閩董璫達狄鞬左騏驥院育良
駟鳳頭錦膊名堪稽以此公麟留妙蹟不脛乃入西
清西徒觀傳神及畫骨詎珍金駿與玉題茲者致貢
愛烏罕昂藏有過無不齊泰西繪具別傳法

前歌會
命郎世

寧爲
圖

沒骨曾命寫裏蹏著色精細入毫末宛然四駿

騰沙隄似則似矣遜古格盛事可使方前低廷標南

人善南筆撫舊令貌銳耳批驄駉駿各曲肖卓立
意已超雲霓副以于思服本色執勒按隊牽馱以
郎世寧之似合李公麟格爰成絕藝稱全提匪說攸聞垂
往訓萬類一理終無睽長歌慙匪工部健徒懷往作
吟蘇俟

長城行

長城長城何崔嵬人不能爲平聲鬼爲去聲開平岡風雨
或頽落絕壁傑豎仍隄隗碎礫埋砂識秦代其下白

骨久成灰前人所爲後人效恃此欲拒北馬來長城
處處皆可入處處守禦真愚騃叶君不見側峯橫嶺
雲中峙飛鳥難緣城自疑爾時發帑奚供此民脂民
膏盡於是二世而亡猶幸耳逢君刺下誰承旨蒙恬
地脈言何鄙

趙霖畫唐太宗六馬圖歌

宋家王孫金待詔獨出藝苑稱精妙忽爲昭陵六馬
圖六馬一一皆神肖天閑萬驥非所師粉本乃藉琢

石爲仲容

殷

撰文兩漢嬀率更

歐陽

書法千秋垂馬皆

有號有次第核之金石頗倒置何須求劍定刻舟不

取其工取其義當時開創真天人入險斫陣皆躬親

馬或中箭不一足更有獨立拔鏃臣一馳建德要領

斷再馳世充旗纛亂據鞍取洛靖鯨鯢迴轡平蜀濟

危難雙雙鵠立陵闕間箭痕馬汗模糊殷文皇詎自

旌神勇要使後世知艱難君不見開元乃誇照夜白

宮中擊毬好顏色丹青所貴鑑興亡爲想李圖三太

息李公麟明皇擊鞠圖石渠寶笈上等

詠駝

駝有懶乳者忽復厭其駒踈齧不肯哺弱難飼以芻

稗粹待凍斃行將棄諸塗惟彼特墨赤

蒙古謂駝爲特墨特墨赤

牧駝者也識性計有餘胡笳奏其旁哀腔嗚嗚嗚感駝心

生憐駒乳乃如初藁鹽旋長成致遠收良圖口詢非

耳聞此事信匪誣嗚呼駝獨非獸乎凱風之母獸不

如

過盧溝橋詠冰解

水黑爲盧冰亦然隆冬凍合澤腹堅東風一夜入長
川解之祇在須臾間青氣鼓動橐籥宣元英不得施
其權層疊黝玉巨如山纍而置之河兩邊其高峩峩
長連延黃流在中瀉激湍方當初解竒可傳礪礪碎
磕聲喧闐快馬斫陣驚擊鳶似神而非三似焉亦不
衝蕩石橋堧信非人力斯由

天襟帶皇州億萬年

樹根楊歌

蒼垠霄堦昔屈盤建木大椿曾齊年蔽虧魄淵凌旻
烟吳質試斧忽兀然翻教閱世全其天公輸不敢繩
墨牽其堅如石香曲拳玲瓏萬竅非穀鑽坐之望古
卧之安宣尼因見公旦顏小哉蕃爲孺子懸膝誰敢
容腹敢坦叶琉璃翡翠七寶欄自拜下風羞華妍肅
穆如見羲皇前宵衣旰食吾勉旃匡牀安帖非所便
擬付莊生夢蝶眠

觀皮日休集因作

襄陽間氣自標擬隱居鹿門期不仕天隨子與相倡
和二十八卷詞誠美居然進士登咸通幕府朝衙已
委靡何至學士署黃巢爲去聲作讖詞翻害已進退無
據羞斯文然似斯者不少矣吁嗟末路其誠難適百
里半九十里

白海青歌

有序

霍罕汗額爾得尼嚮風款塞獻白海青一重數

譯而達京師所謂積雪全映飛花碎點信鷺鳥
之奇特者也金元以來賦海青者率目爲海東
之產故有扶餘東溟之詠今林丞所掌金眸玉
爪迥異凡材者蓋習見習聞茲霍罕地在玉門
萬里外於古爲大荒以西順秋氣而應瑤光其
精明俊竦爲金方之英固宜旣命郎世寧繪圖
狀其神貌更賦七言長句以紀其實匪若天馬
興歌極鋪張誇詡之爲亦如旅獒底貢深持盈

慎德之思耳

海東翻飛下海西

海青本名海東青

變青爲白斯更奇東木

西金五行配各從其色非人爲霍罕部在天山右其
汗名額爾得尼據誠通貢致方物鞠來驚鳥隨譯鞬
黃睛玉爪氣雋逸素翹皓羽光陸離籠育林監昭遠
服爲之造屋誠無稽見元史豪騰雄擊都弗藉純精朗
潔覃宜題瑞圖越裳漫比擬寫形傳實寧可遺寫形
傳實寧可遺久安永奠殷吾思

荷浦謠

薰風入池池水暖新荷一夜開
宛宛錦颺漾漾噴紅妝珠露離離擎綠繖
回首湯泉芳欲闌小遲消得長鮮妍十分春始三分矣
勸君漫放採蓮船採蓮聞說江南好吳孃越娃鬪窈窕
誰知霞影翠陰中人花都向秋光老晚來寶月琳塘披清葩
嫩朵羣收姿藕腸纖縷何分別物性可知不可知蓮葉東西魚最樂此
景隔年却如昨

御湖夕景

六月十四日

御湖夕景今夕奇晴雨雲月全攬之初載斜陽延晚
爽樹蟬響答如填簾爾時東宇月已掛漸覺光朗烏
藏曦須臾西南雲作勢橫塘斜拂霏芬絲芬絲旋止
雲片破忽隱忽現金波披維舟際復全體露花漏曾
未過一時恍可人目有如是變化頃刻誰所爲欲問
變化誰所爲太空冥冥付不知

憶昔一首示直隸衆官

憶昔壬午過是郡甫經災沴民未蘇歷覽雖鮮鳩鵲
狀寧免飾觀經蹕途其歲夏秋復兩失調幕乏計惟
增吁蠲租賜賑不稽澤救急詎弗遺向隅

上天好生默旋轉癸未幸歌西成愉昨年夏秋更均
穫桑棉瓜菜皆豐腴策驄欣閱元氣復黃童白叟真
懽娛戶有崇墉村象美衣無須撻人面舒乃知補苴
信何濟力田豈似逢年乎因之逋賦槩豁免索俾閭
閻追追呼方伯有司曰扈蹕此慶共銘汝與吾然宜

抱愧何修致不宜志滿誇祥符

降旨免宿遷等四縣本年正賦十分之五詩以

誌事

憶我三番曾過此滿目民艱恫瘼視蠲租加賑不少
靳究亦無能瘡痍起壬午之歲博訪咨畧覺其中悉
源委因之疏剔六塘河果然潦退堪耕耜人事盡而
天貺隨連歲秋收皆穫美茲來殊覺大改觀憑輿歷
覽心生喜戶有蓋藏育雞豚衣鮮上聲襍裂贍婦子不

災不賑矣所加究欲加恩念無已因思時巡免正供
十分之三常例耳數縣瘠土應倍憐益二至五斯可
矣留有餘用蘇茆簷減一半惟投縣匭佇看元氣復
閭閻庶協以休以助理

遊金山寺四疊蘇軾韻

大江入中國十分到此三分已近海河常有患江無
患偶然亦復有患在去歲荆楚肆難陀尾打浪冠須
彌波文泉監利被災重賑卹寧靳費帑多瓜州城下

走舟楫坍沙日甚於一日
焚燹保護那可施南望心
憂爲黔赤漲退城安定駭魄民色如前澤而黑輕艫
重翦江波明爲思昨夏猶餘驚我有恒心民盡識屢
巡豈緣攬景物韶春復駐氏父山強和蘇韻不避頑
獨愧詒詒言未已可知旣水弗洗水

白金山放舟至焦山四疊蘇軾韻

兩岸束江深眈眈瓜步在北京口南天塹形勢攬已
熟奚啻曰再與曰三金山放舟纔片刻迴視銀海擎

黛巒山包屋處欠一到隱慮或致焦先慙順流鼓枻
意甚快風浪奚礙心澄潭故知羅蠟草木茂枝姿葉
態迎春酣乃復寺旁構行館成事不說何勞談小憩
弗宿發青雀調御月面空花龕熾然今昔非今昔中
邊食蜜皆甜甘獨是結習寄吟詠屢賡蘇韻寧辭食
八州牧同五斗祿見蘇詩一長老商七不堪呼之欲出
難想像但聞其聲留谷菴亦用蘇語

舟行雜興

大船張帆如箭急小船爬沙苦弗及以篙釣挽大船
尾搗小船行巧注挹大船人怨遲已行小船人樂省
力勑中才者不中才養故人樂有賢父兄一射生挈
十鈍手國語舊有一善射生者十鈍手隨
之之謠其警正與中才之意同國有舊語
亦知否

焦山觀古鼎作歌再和沈德潛韻

焦山初萃羽衛屯金山西望眞弟昆大江浩浩勢莫
並羅刹奚足稱抹坤三度此曾未一駐頓置自謂非

溫存丹徒策馬尋野路北固迴望猶高蹲翦流片刻
達彼岸眇影已覺清神魂重書瘞鶴碑宛在舊碑仍
弄屋漏痕僧菴鎮寶定何是合屬周鼎寧虛言龍光

鳳文騰駁犖古色可覩不可捫詠事義正王銓部王士

祿七言詩刺嚴嵩最詳釋文古博程崑崙程邃釋篆文後來老

沈歌亦好皆足佳話傳空門憶我辛未喜剏遇長歌

曾和元音渾丁丑壬午姑舍是見則見矣仍祇園茲

來勝景住信宿風恬浪靜峯黃昏登臨興畢憩虛室

洪篇險韻從頭論，聚星孤嶼例尚在。萼山京口跡早吞，滄桑有變鼎不變。永同焦阜延高奔，冊令世惠衣。

錫元

櫟括鼎誌語

恒看虹彩燭紫闥

題黃樓三疊蘇軾韻

疊險寧非滕口說，每遇蘇詩興軒發。黃樓三登可默去，却慮格卑緣手滑。遐想當年事修築，豈有閒情辦布襪。隔時水退遇重陽，把琰對花恣豪呬。憶我丁丑始莅此，急葺石隄舉籠鋪。是時災餘百室空，鵠面鳩

形可憐煞壬午重來則改觀雲龍酬惠起神剎田有
農夫荷鋤耕屋有織婦鳴機軋卽茲元氣實大復倉
庾陳陳相因壓爲民愁亦爲民慶城樓埤堦俯鑿鑿
綈几清閒命墨娥錦屏馥郁噴金鴨旋教清蹕轉行
宮老幼勸隨走鞞雪

小石城歌

石城扼控盤之阻太行提封固百堵是何鬼工疊石
成天然梁麗架樓櫓羸顛項蹟不與去聲聞松戟泉池

永爲伍轅轅潼關真小哉幾人守復幾人取無取無
守視斯城恒占徐無千萬古

莽子行

莽子緬甸之屬夷炎徼以外非羈縻爾來朱波多內
亂紛爲雄長相爭持無暇顧莽莽猖獗蹂躪漸及諸
土司土司列居州縣外實我滇省之藩籬而何貂獫
無遠慮金帛餌莽莽益滋更兼召散覲孟艮遂引莽
匪爲憑資竟據孟艮作窟穴肆其焚掠靡介遺是時

劉藻實方伯意在姑息遷延期豈知養癰乃成患爰
始發兵封奏馳藻本書生曉民事軍旅之事非所知
亟易重臣命往代內地民務原相宜應琚至彼需時
日藻所發兵少且遲忽稱全軍盡覆沒忽稱六百五
百歸所報三弁戰歿者又皆無事還營麾藻乃白簡
劾三弁猶謂貪功喪軍威是皆無備遇賊竄亦藻之
奏那云斯先是莽犯整控際藻以普洱藉託詞倉皇
遂棄思茅返吁嗟詎可猶寬其褫職以爲衆臣戒用

人之失自忸怩驛行萬里旨未到忽報藻刎誠大奇
守土之臣生死共並未失土奚爲而節鉞觀瞻責暴
重自死三軍其賴誰應琚馳至報其故始事藻已驚
魂飛股戰不知措手足數日絕食強_{上聲}乃飴終致飲
劍斃已命非捐軀比懼所爲鴻詞博學信何用文章
點筆詠牧之輕裘葛巾不跨馬儒將古有今何稀乃
至跼蹐失素守匹夫之諒擬猶非滇南文武傳笑語
詎滇南也千古貽蠻觸豈足汗我斧得人自速安邊

陞得人自速安邊陲緝兇靖遠佇待茲

後莽子行

將謂莽子少猖獗不然劉藻何自刎幸予聞信早易
督不然軍務誰爲準疥癬豈足興六師土司遭燹亦
堪憫綠旗兵雖非勇戰守土之責調以近比及閣督
至滇南早報藻也小弗忍其時統軍兩總兵廓清邊
徼威已振叶因知莽子怯於雀綠旗已足毆叢隼孟
良整欠實賊巢賊首棄之逃迫蒼閣督馳檄二統戎

務獲賊首毋容隱莽子之役畢於此次第撤兵無事
緊十三版納昨蹂躪招徠荒土俾勤墾土賦不多亦
正供降旨豁免蘇窮蠹譬之庸愚御駑馬弗進於行
徒傷吻庖丁游刃有餘地事在人爲言益允

元制誥之寶歌

理藩院摺具奏聞鄂爾多斯呈辭申東魯卜瞻磋其
人爵列貝勒五等掄所屬敦珠克旗軍牧羊哈達圖
山垠風沙中見金色焜掘得一章剔苔痕諦觀不識

何所云似非尋常印則真貴物不敢私留存敬報典
屬獻九闔開匣發囊摩視頻制誥之寶小篆勻用鈐
勅諭頒絲綸范金五成擁瑞雲升龍蜿蜒之而鱗上
結寶燄敷玢璘更鐫天竺平頭文咨於章嘉胡土譯
語陳三寶呵護吉祥臻審知此器貽大元爾時敬佛
黃教尊威震外域中平原國師八思巴超羣授戒於
內外諸臣卓哉希憲獨不遵無何天魔踵事新人事
日壞神弗欣皇覺寺僧劉季倫創業撫安天下民倉

皇出塞重器淪閱世自出龍堆墩藩臣表進嘉忠純
衛拉鐵章那足論其制大小誠迴分聯類比事鏡戒
諄殷鑒在夏周在殷

朱碧山銀槎歌

彝尊長歌詠雙觶一成壬寅一乙酉鑿落銀器誰所
爲乃出朱氏碧山手酉者展轉入孫家

承澤

寅者宋氏

琬

所珍守一時豪客醉流霞快寫牢騷鬪吟口率徵

故事稱張騫漢書不識曾讀否漁洋居易辨頗精先

得我心是此叟有抹之槎格實奇乃自孫藏非宋有
雕鏤絕藝不重僅諸人麗句早精剖偶因博古一致
評置之弗用戒旨酒

錦雲騅歎

良馬有良德不在驍騰在持重如其兩者能兼全是
則神驥之接踵錦雲騅斯實有焉惜哉齒長

平聲骨已

聳五臺跋雪山餘騎蹢躅穩弗動懷柔行潦途滑刺
中如步平壟邇年養老育內廐飼秣仍教慎筮稷時

命牽來一撫視四蹄木強

去聲

嗟蹶腫昂首長鳴意若

云心有餘而身難勇久經致力應致憐詎謂天閑今

乏大宛種

青雲片歌

萬鍾大石青芝岫欲致勺園力未就已達廣陽却弗

前土墻繚之葭屋覆

見米萬鍾大石記語

適百里半九十里不

然竒物靳輕售向曾輦運萬壽山別遺一峯此其副

雲龍氣求經所云可使一卷獨孤留伯氏吹填仲氏

簾彼以雄稱此通透移來更覺易於前一例爲屏列
園囿勒題三字青雲片兼作長歌識所由叶有時爲
根黶黶生有時爲峯芳潤漱虛處入風籟吹聲竅中
過雨瀑垂溜大青小青近相望突兀璣瓏欣邂逅造
物何處不鍾靈豈必莫釐乃稱秀事半功倍萃佳賞
宣和之綱誠大謬

興州攬古言懷

興州於古爲遐荒長城築守防秦亡遼金元漸開版

章惜哉宅中未久長縱有墨客怯塞涼掛一漏百名
空償建置今亦不可詳大清一統撫萬方

題古玉斧佩

觀玉之質弗觀英英華斂盡惟老成雖無其人存典
型睪然望古遙集情佩弦佩韋義各行無故不去訓
獨精或琢爲佩斧其形所取能斷喻廉貞乾剛著象
予聰聽

和闐採玉行

和闐昔于闐音訛傳致差今之和闐惟採玉昔之于
闐乃採花採花信無用太白寓意蜚詞華採玉供追
琢琅玕豈歎埋泥沙然玉亦有別砒砒貌似寧足誇
和闐採玉人抱玉出水涯何曾璞裏之不掩瑜與瑕
刑足之語本荒誕千秋紀載百無一實真堪嗟

勤政殿璫璫褥蟲齧命易之戲成是作誌意

土蕃霞氍貢成褥取冬溫織毛易生蟲食齧成篆文
中人鋪設告畢事物壞那問柳宗元時偶見之因失

笑常朝地卽同廊廟銀鐺僞約我鄙其命卽易施勤
政要此乾此惕卅餘年萬民念念切惻瘵有災籌賑
恤無災優追蠲百億帑金曾不惜一禡之費何有焉
暴殄天物德實否惟辟玉食必有理大禹卑宮力溝
洫然於黻冕亦致美私服浣濯事之常持以示儉斯
小矣

珊瑚樹

說林珊瑚樹竟開花河伯宴禹信荒誕南海更以婦人

稱述異之記騁詭辨石崇所擊或類真惟其類真益
形舛三四尺者六七株非自天來非地產郗王籍王
振家時二十餘株入官輦審然此應在世間不可謂
同桑海變叶百歲昇平天府藏盈尺者弗一再見叶
此非却珍知世無石崇王振安從管咄哉千秋紀載
家顏腴耳食逞虛撰

照乘珠

昔者齊魏田於郊魏問齊亦有寶否爾時威王實善

對正言告之曰無有梁王誇有徑寸珠照車十二乘
前後威王乃曰與王異有臣四人境分守諸侯皆來
不爲寇道不拾遺盜避走是則可以照千里梁王不
懌自覺醜寶人寶物固不同賢愚倍蓰奚待剖徑寸
之珠世實無況十枚焉騰妄口馬遷好奇每傳訛韓
詩別紀齊宣久

表曰修錄近作靜宜園詩並呈遊碧雲寺長歌

因用其韻率題並令和近作韻

憶昨小駐靜宜園春雲忽斂春日暄近臣知有遊山
喜那識惜望殷巖軒尚非迫切待澤候散悶石磴聊
登援曠覽之臺一騁目下視鳥背相飛翻翼日清曉
起問政輪班畢集諸卿垣惟虞伺意稱事簡那肯適
已嫌人喧勅幾已罷聽退食碧雲有寺別有門挈朋
攜侶許遊厯嚴禁奚用誰何尊古松卧墻掛飛瀑活
水如畫蜀兩孫淨土春陽已作意並無荆棘惟蘭蓀
俗僧緇黃概弗藉鐘魚靜伴山朝昏一株銀杏十合

抱千年以上人曾捫其枝寄生鬱松柏龍蔥葉共扶
晴瞰世間奇事無不有炙轂那辨淳于髡洗心亭下
潄泓水到此心洗空潺湲山房試泉更悅性摩挲筠
鼎光且溫北壁之下淙乳竇流陰可會如斯奔荇藻
梳似綠玉帶一一皆可尋其根勝迹吾無隱乎爾詞
臣於此能忘言錄我近作殿長韻點竄豈無意所存
雜詠五十皆短什書厨未足酬長恩乘興輒復賡巨
作樂天中的已示樊更當全冊爾遍和東坡例具懸

水村屈指三朝卽啟蹕促成佳話不可護

緬莽

緬以地稱莽以姓木梳又因部落名究之其三乃卽
一至今方悉其真情木之擾西蓋已久劉藻畏事惡
稱兵莽之犯東在前歲藻慮敗露乃自刑無何瘴起
莽亦退應琚攘爲功已成所誅數莽僅助惡召散已
遁阿瓦城申命索之實未索反受數部來投誠古云
受降如受敵一無預備緬來爭綠旗之習素誇詐應

三
琚病際被惑熒既至病痊畏不掉遂肆欺誑圖蒙聽
軍無紀律績奚奏向吾言失擬庖丁滇師僨事誌大
畧用人弗當去聲慙怍怍

射熊行

虞人來報熊咆林伏飛親率崇椒尋倏眴羣逐出叢
樾一箭要害洞中去聲深馥焉肆地目精散封馳有力

馱難任復報翠微出其子駐馬掩搏觀勇士須臾子
路入檻籠手羆足鷹寧虛揣畜之虎圈暫貸生平原

不射非所擬

放雉行

大蒐之便亦設羅有雉罹焉獲實多籠收車載率生
致淹寒重試饗則邯山莊林泉清且美取諸於彼放
諸此開籠飛去任所之悠然逝若縱壑鯉憑觀自欣
繼自笑瀕死倖生雉豈料煦嫗爲仁詎所期愛物應
須識其要

題漢玉夔磬

有玉之質泯玉英八土出土含土精夔文辟邪縱復
橫無不留手如天成噓呵發潤沆瀣生堯年寶露貯
盈盈謂之爲漢頓置評似曾夔手夏擊鏗祇今猶作
簫韶聲

木根如意

是器置乾清宮西暖閣曾經

皇祖手握欽思

敦樸敬識長言云爾

奧壤不知厯幾上聲切温室已經閱百年握君之中此

巨壁泐然古色蔚曲拳雕幾平聲弗用用質樸

指揮萬國歸薰絃高山景仰予其肩

將軍公明瑞輓詩

蠻結之捷鼓勇進孤軍深入心牽縈屢催繼援竟弗
援偵轅駑馬誠堪驚然猶因糧勦猛密計當兩路兵
合并誰料援師竟避賊强弩未被魯縞輕蜂屯蟻襍
截歸路將軍體恤諸孱兵攜數勇士獨殿後不虞中

去聲要害命傾嗟哉捐軀因爲國痛惜如失股與肱雙
忠雙烈及雙義三逢斯四何爲情要當專祠表勲蹟
俾爾千古存如生恨緬事益難中止雪仇大舉期功
成

沈德潛題張擇端清明易簡圖詩至卽用其韻
題卷中

以易易難簡易繁舜舉兩字卓識括萬端世間祇知
清明上河圖誰知羲經妙義乃於世道關爾時宣和

朝士班蔡童王高甲第攢君臣嬉樂答韶節惜無長
繩繫流年亦有舟車賓遠域酒樓豪飲銀杯擲網來
花石競新奇豈計閭閻被辛螫囊金橐幣輸朱門百
姓膏脂飽鬼蜮汴京富貴瞥眼銷可憐畫圖淪草棘
展轉流傳數百年分宜豪放誰能匿嚴敗尤物入大
內小監竊取藏精粹徒供失得閱荆凡那有謨猷告
房魏徵詩閱月並書呈大羣欣猶食履泰擘箋和韻
速就能畫譜考證何須明納忠因事吾所悉廣平不

異圖無逸

練影堂作歌

常時堂中望練影
縱縱疑向雲端落
今日偶從山頂行
脚底流泉掛簷角
乃悟高下本無定
亢中觀鬪非先覺
砰訇振鷺付不知
一例環潛赴深壑
其間樂趣

屬伊誰嘖沫跳

平聲珠有魚躍

題丁觀鵬白描十六羅漢卷

大海湯湯浴烏兔
不風千丈波堪怖
有應真者凡十

六遊戲於斯亂而渡借問上人何自來又復渡將何
處去徒使天龍鞠踰迎渤馬漣牛紛作馭神通卽是
不了義莫若常向箇中住

觀鵬此日之雲鵬又復氏族同爲丁疑是三生薰白
業解與淨土傳真形五百羅漢我作記未免綺語談
三乘此則二八不言說有形無色神亭亭記亦非多
畫非少如是忘所能

題董源龍宿郊民圖

龍宿郊民語甚奇董源嘉跡世所知香光鑒定幀首

題求說不得強

上聲

爲詞謂或簞壺迎王師爾時藝祖

駕未移曹彬命往三軍司龍宿民迎語何來

叶

細觀

畫如首夏期頗有黃葉標樹枝郊原未見出耕犁正

民望雨龍見時兩船列泊川之涯諸童揶揄揚綵旗

又如跋河競水嬉其事亦近請雨爲畫名命義似合

宜誠合否乎吾猶疑鄭俠繪圖此法貽此非諂也實

箴規

其昌跋有名雖諂而畫甚奇古之語

爲君者宜敬念茲北苑妙筆

神淋漓吾又何能贊一辭

董源此圖元以前無辨及者明董其昌題幀端謂
是藝祖下江南時所進御考宋史開寶七年九月
命曹彬潘美將兵伐江南九年正月御明德門見
李煜於樓下則是宋祖並未親征江南安得有郊
迎事若以爲指彬美又不得擬之爲龍況曹彬傳
敘自濟江後連破江南軍亦無迎師語蓋其昌於
圖名不得其解從而爲之詞耳而張丑清河書畫

舫則以爲寫太祖登極事時董源正仕南唐何由
畫宋汴京卽位儀節且所圖亦與受禪不類其舛
更不待辨按傳稱龍見而雩注之者曰建巳之月
蒼龍宿昏見東方萬物始盛待雨而大今閱圖中
景頗似初夏而兩舟銜貫艤水次衆皆聯臂舞躍
彷彿古者跋河之戲疑其郊民見龍宿禱雨所陳
源當日命名意或取諸此夫準經作繪旣勝於傳
史失誣而圖列民事不忘執藝以諫不猶愈於進

諂之不經乎既題長歌以辯之並附識如右